

encomendamos el dicho ofiçio que nuestra entençion fue que vos, por vos mesmo, usades del e non por otro, entendiendo que por ser vos cavallero bueno e ançiano que porniades en ello buen recabdo, segund que cunplia e nuestro serviçio e a pro e regimiento de la dicha tierra. Porque vos mandamos que vayades de usar del dicho ofiçio vos mesmo e estar y regidente, e que non enbiedes alla al dicho Johan de la Peña, ni a otro alguno, ca nos /enbiamos/ mandar al conçeio de la dicha çibdat que non reçiban a otro, salvo a vos, e si vos non podiades usar del dicho ofiçio por vos mesmo enbiadmoslo dezir e nos porniemos a otro para que use del. E non fagades ende al.

Fecha tres dias de setienbre, era de mill e quatrozientos e veynte e hun años. Nos, el rey.

(131)

1383-IX-5. Segovia.— Carta de Juan I sobre recaudación de almorjarifadgos. (A.M.M., C.R. 1384-91, Fol. 76, v.-77, r.)

Don Johan, por la graçia de Dios, rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen e del Algarbe, e señor de Lara e de Vizcaya e de Molina, el conçeio e cavalleros e ofiçiales e omes buenos de la noble çibdat de Murçia, salud e graçia. Fazemos vos saber que viemos vuestras petiçiones que nos enbiastes, e a lo que nos enbiastes dezir en como los arrendadores del almoxarifazgo desa dicha çibdat despues que sale el tiempo de la renta que trahen a los omes a pleito e a contiendas sobre el almoxarifazgo del tiempo pasado, e que maguer an pagado que por quanto non usan los que pagan tomar cartas de pago de los dichos almoxarifes, que por non andar en pleitos que an de pagar otra vez e que llieven algunos cohechos. E que nos pediedes por merçed que mandasemos que los dichos arrendadores que pudiesen demandar el derecho del dicho almoxarifazgo fasta tiempo çierto, e que despues que non fuesen oydos sobre ello. Sabed que nos plaze dello, e por esta nuestra carta mandamos e tenemos por bien que los almoxarifes que fueren en la çibdat agora e daqui adelante que demanden todo el derecho que oviere de aver del dicho almoxarifazgo en el tiempo que los durare la renta e mas otros seys meses despues que la renta fuere cunplida e que dende adelante que non sean tenudos a demandar cosa alguna por razon del dicho almoxarifazgo. E mandamos a los alcalles e alguazil de la dicha çibdat que si demandar lo quisieren que les non oyan sobre ello. E los unos e los otros non fagades ende al por ninguna manera, so pena de la nuestra merçed.

Dada en Segovia, çinco dias de setienbre, era de mill e quatrozientos e veynte e un años. Nos, el rey. Ferrand Arias.

